

The coronavirus matter wey don dey cause wahala everywhere first enter Naija on 27 February and e start for Lagos state. The tin cause many many fake news wey make NCDC and Federal Ministry of Health dem begin try calm pipo down, try make the sickness no spread. All of us need join hand make sure say we knock this virus correct apako so make we dey talk only news wey we don confam say na true; and make we dey do the ones wey go make the virus fear to near our domot.

The Coronavirus CivActs Campaign (CCC) dey gather different rumour and tori wey Naija pipo dey talk for different states make we help ordinary pipo understand wetin dey happen; so that beta information go dey flow well well for government, media, NGO and even the citizens dem. Once we talk the real gbege of wetin dey happen, all dem fake news go stop to dey spread before they cause more wahala for our country pipo. You know say no be all of us get the same language and no be everybody sabi this English well well so we need this CCC make everybody understand wetin dey happen so that we go finally throwaway this bad sickness comot for our country. One company wey dem dey call Statista talk say na only like half of Naija wey dey see internet use, so make we try help the other half wey no get.

## How COVID-19 dey take spread

News from all over the world don show say COVID-19 dey spread fast, and na because say e dey easy make one person carry am give another of hin padi. Na for inside lung coronavirus dey spread and no be only coughing and sneezing dey spread am, even just to dey talk and breath fit spread am too.

Even NCDC case numbers wey dem don dey release for the past 3 months don show say the virus dey spread fast. One month after NCDC begin announce figure on February 27, after they begin test people wey come fresh from oversea, they come announce say we get 40 pipo wey don test COVID-19 positive.

As e come dey sure say COVID-19 cases don rise small, government come announce lockdown on March 30 make e no spread more much. For back, NCDC dey try increase the number of lab fit test for the virus. But many pipo no gree do the lockdown even for the Lagos, FCT and Ogun wey they talk say the sickness plenty pass. As nobody dey sure of palliative wey government begin share that period, pipo wey no fit work for house begin comot make they find money see food chop. Na so on April 23, COVID-19 positive cases for Naija come reach 981 people.

As small small security gbege come dey set, just like the one million boys wahala for Lagos; government come talk say dem go reduce the lockdown small on May 4, even as cases dey rise. For that period many pipo begin die anyhow for Kano so dey come announce total lockdown for that state. But upon all the announcement wey government bin dey announce, pipo still dey travel go other states and pipo continue their normal hustle. By May 23, COVID-19 positive cases don reach 7526 and e come sure say no be only pipo wey come from abroad dey spread am now.

As this COVID-19 dey spread so, we no come know how June go be, because say if cases continue to dey rise like this all dem hospital and isolation centres go begin full. If hospital begin full, e go come dey affect even pipo wey their own sickness no be COVID-19 sef. Even Lagos don already talk say no more bed space for treatment and pipo wey dey show mild symptoms go begin treat themselves for house from now on.

As matter don dey set, e dey important make citizens take responsibility make the virus no spread more much, make we dey practice the social distancing wey dem dey talk, dey wear facemask. Other countries like Czech Republic wey dey take all these measures, their own positive cases don dey drop.



## COVID-19 CASE UPDATE

### 4 New Cases Confirmed

11:00p.m. 23rd March, 2020

TOTAL CONFIRMED	40
ACTIVE CASES	37
TOTAL DISCHARGED	2
TOTAL DEATHS	1

NCDC Toll-free Number: 080097000010

Twitter/Facebook: @NCDCgov/ COVID19.NCDC.GOV.NG



## COVID-19 CASE UPDATE

### 108 NEW CASES CONFIRMED

11:30p.m. 23rd April, 2020

TOTAL CONFIRMED	981
DISCHARGED	197
DEATHS	31

NCDC Toll-free Number: 080097000010

Twitter/Facebook: @NCDCgov/ COVID19.NCDC.GOV.NG



## COVID-19 CASE UPDATE

### 265 NEW CASES CONFIRMED

23rd May, 2020

TOTAL CONFIRMED	7526
DISCHARGED	2174
DEATHS	221

NCDC Toll-free Number: 080097000010

Twitter/Facebook: @NCDCgov/ COVID19.NCDC.GOV.NG

## YEYE TORI



Facemask with valve for front dey better to use than hospital and ankara mask

If you dey wear the hospital mask the white part suppose show if you no get symptoms

As they cool the Lockdown e mean say COVID-19 cases don dey reduce

COVID-19 just dey like malaria and malaria drug fit cure am too

If you too wash hand you go fall sick

## VS



## TRUE TORI

Facemasks with valve for front no good to dey use for COVID-19 pandemic because when you breathe, the valve go come open, and e go release all the air from inside the mask go outside. If you Cough and sneeze when you dey wear those kind mask e go release all the cough water and na so the virus dey take spread be that.

Na only one way you suppose wear hospital face mask and na the normal way make the colour part dey show outside. If you turn the face mask the other way e no go improve your protection plus e no mean anything sef.

Presidential Task Force on COVID-19 talk say na because of economy and security wey dey relax the lockdown. Citizens still suppose dey practice social distancing dey wear facemask make the virus no too spread. They still dey record new positive cases every day.

Malaria and Coronavirus na two different type of sickness even though both of them dey cause fever. Na virus dey cause COVID-19 while na parasite dey cause Malaria. Person still fit get the two sickness at once. E never get any malaria drug wey dem don confirm say e dey cure coronavirus.

Too dey wash hand everyday no fit kill the normal bacteria wey dey your skin except you begin dey injure yourself. But e sha no good make you dey wash hand every minute as e fit affect your skin.



# New new tins wey we don dey learn about COVID-19

Even as people still dey fear the virus, scientists dem still dey try understand how the sickness dey take do. NCDC don talk say they wan start to dey make their own COVID-19 test kit` after dey don finish first phase of testing. The new test kit wey dey wan make na National Biotechnology Development Agency (NABDA) dey try build am, and e go fit test 20,000 pipo a day. NCDC chairman don announce say he wan try test 2 million people in the next 2 months.

E get one experiment for Singapore wey show say person wey get COVID-19 no fit share the virus once 11 days don reach after they bin sick, even if they still dey test positive. Na 73 patients they bin test for this experiment. Wetin make this information make sense be say, e go fit help doctors know when to discharge patient from isolation centre, make bed space dey free for treatment centre and e go help make people no too fear COVID-19 patients after they recover.

Scientists don dey try learn whether person fit catch COVID-19 more than once. For South Korea, e bin get one gbege wey happen wey many patients bin test positive for COVID-19 after dey don discharge dem finish. But as they check the patients again, they come find out say they no fit share the virus. CDC for Korea come do another experiment on 285 patients wey show say the virus wey dey carry no fit infect another person.

## CORONAVIRUS AS IT DEY FOR NAIJA TODAY - 07/06/2020

**13,873**

CONFIRMED CASES

**382**

DEATHS

**4,351**

RECOVERED

**85,375**

TESTED

Coronavirus CivActs Campaign na information wey we bring from Accountability Lab Nigeria.

